

Item dit sijn der hoger hiemraden kueren ende schouwedagen van Schielant:

1. (*Schouwdagen.*)

Item den eersten schouwedach des Woensdages nae sinte Odulphusdach up 2 ¹⁾ sc.; den anderen schouwedach des Woensdages nae sinte Louwerijsdach, dat is die leggende schouwe, up die boeten van 10 sc. ende upter hiemraden theringe. Item die derde schouwe is des Woensdages nae sinte Martijnsdach in den winter alle dyken in hair volle groot te wesen ²⁾ up 10 sc., then ware offet den hiemraden onnosel dochte wesen. Voirt alle jair te versamenen des Woensdages nae sinte Pietersdach in Zelle ende dan die waterscappe te peylen ende voirt den schouwe van der dijckaedzen ³⁾ te kueren.

2. (*Schouwdagen.*)

Eerst so hebben die hoge hiemraden gekuert, dat alle dyken binnensdijcx ende buytensdijcx, alle barmen, alle hoofden, alle horden, alle muyren, alle platen, alle staken, alle watersceppen, volcomelijc in hoir oude groot te wesen, dats te verstaen, dat sonderlinge elke staeck also groff wesen sal als eens mans diede off grover, ende up elke voet breet een stake te staen of meer, ende die platinge also hoech te wesen als boven maelvloede, dat is te verstaen die maelvloede, die int gemeen omtrint Bamis gaende sijn, ende dat mach ⁴⁾ twe van den hogen hiemraden dan beschouwen ende sonderlinge, dair muyren sijn, die platinge enen voet hoger te wesen, ende dat sel wesen totter hiemraden bescheidenisse, ende wes dyken

¹⁾ Keurboek no. 3 en no. 4 hebben: „10”.

²⁾ Het volgende deel van dezen zin ontbreekt in Keurboek no. 3.

³⁾ Keurboek no. 1: „ende voirt van der dijckaedzen schouwe te kueren.”

⁴⁾ Volgens Keurboek no. 2, no. 3 en no. 4; no. 1 heeft: „noch”.